

ZAKON O SUKOBU INTERESA U INSTITUCIJAMA BRČKO DISTRIKTA BOSNE I HERCEGOVINE

(Neslužbeni prečišćeni tekst - "Sl. glasnik Brčko distrikta BiH", br. 43/2008, 47/2008 - ispr., 3/2015 i 13/2019)

PRVI DIO - OPĆE ODREDBE

Član 1

(Predmet)

Ovim zakonom, radi sprečavanja sukoba interesa, propisuju se posebne obaveze izabranih zvaničnika, nosilaca izvršnih funkcija i savjetnika u institucijama Brčko distrikta Bosne i Hercegovine (u daljnjem tekstu: istrikt) u obavljanju javne funkcije.

Član 2

(Definicije)

Izrazi upotrijebljeni u ovom zakonu imaju sljedeće značenje:

- a) "**institucije Distrikta**" su sve institucije Distrikta koje su osnovane Statutom i zakonima Distrikta i koje se finansiraju iz budžeta Distrikta;
- b) "**ovlaštena osoba**" je osoba koja je osnivačkim aktom ili statutom preduzeća ovlaštena da predstavlja i zastupa preduzeće, poduzetnik ili fizička osoba koja samostalno na tržištu obavlja djelatnost radi sticanja dobiti;
- c) "**bliski srodnici**" su bračni i vanbračni partner, dijete, majka, otac, usvojitelj i usvojenik izabranog zvaničnika, nosioca izvršne funkcije i savjetnika;
- d) "**srodnik**" je bliski srodnik, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepana i dijete bračnog partnera;
- e) "**interesno povezana osoba**" je srodnik ili osoba koja je sa izabranim zvaničnikom, nosiocem izvršne funkcije i savjetnikom u ličnoj, političkoj, ekonomskoj ili drugoj vezi koja bi mogla uticati na objektivnost u radu izabranog zvaničnika, nosioca izvršne funkcije i savjetnika;
- f) "**izabrani zvaničnici**" su zastupnici Skupštine Distrikta;
- g) "**nosioci izvršnih funkcija**" su članovi Vlade Distrikta, bilo koje druge osobe koje imenuje gradonačelnik, a čije imenovanje odobrava Skupština Distrikta i osobe koje imenuje Skupština Distrikta, a na koje se ne primjenjuje Zakon o državnoj službi u organima uprave Brčko distrikta BiH (u daljnjem tekstu: Zakon o državnoj službi);
- h) "**savjetnici**" su savjetnici izabranih zvaničnika i nosilaca izvršnih funkcija kako je to utvrđeno propisima Distrikta;
- i) "**ulaganje kapitala**" je ulaganje novca, stvari i prava u vlasničku strukturu preduzeća;
- j) "**finansijski interes**" je:
 - 1) svaki interes kojim se izabranom zvaničniku, nosiocu izvršne funkcije ili savjetniku omogućava da primi novac u vrijednosti većoj od 1.000 KM godišnje,
 - 2) svaki vlasnički interes u privatnom ili javnom preduzeću, koji ima izabrani zvaničnik, nosilac izvršne funkcije ili savjetnik, a koji odgovara vrijednosti od najmanje 10.000 KM;
- k) "**poklon**" je svaka isplata, djelovanje, usluga ili predmet od vrijednosti učinjen neposredno primaocu, bez naknade ili očekivanja naknade, što naročito podrazumijeva: novac, stvari, prava, papire od vrijednosti, usluge bez naknade, drugu datu ili obećanu korist, ugostiteljsku uslugu, uslugu noćenja, oprost duga ili obaveze, putni trošak ili slična usluga, ulaznica, umjetnički predmet, suvenir, osiguranje ili slična usluga, medicinska ili slična usluga koja nije plaćena po tržišnoj cijeni;
- l) "**privatno preduzeće**" je svako preduzeće osnovano i registrovano u skladu sa zakonom, a koje nije javno preduzeće;
- m) "**javno preduzeće**" je preduzeće osnovano u skladu sa Zakonom o javnim preduzećima u Brčko distriktu Bosne i Hercegovine;

n) "**javna funkcija**" podrazumijeva poslove izabranog zvaničnika, nosioca izvršne funkcije i savjetnika koji proizilaze iz funkcije koju obavlja;

o) "**lična usluga**" je djelovanje kojim se jedna strana obavezuje obaviti određeni posao, a druga platiti joj za to određenu naknadu, koja ne proizilazi iz radnog odnosa.

DRUGI DIO - SUKOB INTERESA I OTVORENOST

Član 3

(Sukob interesa)

Sukob interesa postoji u situacijama u kojima izabrani zvaničnici, nosioci izvršnih funkcija i savjetnici imaju privatni interes koji utiče ili može uticati na zakonitost, otvorenost, objektivnost i nepristrasnost u obavljanju javne funkcije.

Član 4

(Principi djelovanja)

(1) Izabrani zvaničnici, nosioci izvršnih funkcija i savjetnici u obavljanju javnih funkcija dužni su:

a) postupati zakonito, efikasno, nepristrano, časno, te se pridržavati principa odgovornosti, poštenja, savjesnosti, otvorenosti i vjerodostojnosti;

b) pridržavati etike poziva i funkcije koju obavljaju;

c) djelovati u interesu građana;

d) imovinu, sredstva za rad i finansijska sredstva koja su im povjerena koristiti isključivo u svrhu za koju su namijenjena i na efikasan način.

(2) Izabrani zvaničnici, nosioci izvršnih funkcija i savjetnici su lično odgovorni za svoje djelovanje u obavljanju javnih funkcija na koje su imenovani, odnosno izabrani, i politički su odgovorni prema tijelu ili građanima koji su ih imenovali, odnosno izabrali.

(3) Izabrani zvaničnici, nosioci izvršnih funkcija i savjetnici koji obavljaju javne funkcije trebaju se ponašati savjesno i odgovorno, ne ugrožavati povjerenje i pouzdanje građana, poštovati zakon i druge propise kojima se određuju prava, obaveze i odgovornosti u obavljanju javnih funkcija.

(4) U obavljanju javne funkcije izabrani zvaničnici, nosioci izvršnih funkcija i savjetnici ne smiju:

a) svoj privatni interes stavljati iznad javnog interesa;

b) koristiti javnu funkciju za ličnu dobit osobe koja je s njima povezana;

c) biti ni u kakvom odnosu zavisnosti prema osobama koje bi mogle uticati na njihovu objektivnost;

d) primati nikakvu drugu naknadu, osim ako je to zakonom izričito propisano.

(5) Izabrani zvaničnici, nosioci izvršnih funkcija i savjetnici u vrijeme obavljanja javne funkcije primaju platu i naknade za funkciju koju obavljaju, u skladu sa zakonima.

Član 5

(Nespojivosti u odnosu na javno preduzeće ili drugu instituciju Distrikta)

(1) Javna funkcija izabranog zvaničnika, nosioca izvršne funkcije ili savjetnika nespojiva je sa funkcijama iz stava 2 ovog člana u javnom preduzeću ili u drugoj instituciji Distrikta, osim ako posebnim zakonom nije drugačije propisano.

(2) Izabrani zvaničnici, nosioci izvršnih funkcija i savjetnici, za vrijeme obavljanja javne funkcije, ne mogu biti:

a) članovi upravnog odbora, članovi nadzornog odbora, članovi skupštine, članovi uprave ili menadžmenta, ovlaštena osoba u javnom preduzeću i

b) članovi upravnog odbora, članovi nadzornog odbora, direktori institucija Distrikta.

(3) Izabrani zvaničnici, nosioci izvršnih funkcija i savjetnici dužni su podnijeti ostavku na svaku od nespojivih funkcija i poslova, u roku od tri dana od dana preuzimanja javne funkcije.

Član 6

(Nespojivosti u odnosu na privatna preduzeća)

- (1) Angažman u privatnom preduzeću, u uslovima u kojima se stvara sukob interesa, nespojiv je sa javnim funkcijama izabranog zvaničnika, nosioca izvršne funkcije ili savjetnika.
- (2) Izabrani zvaničnici, nosioci izvršnih funkcija i savjetnici ne mogu biti članovi skupštine, upravnog odbora, nadzornog odbora, uprave ili menadžmenta, niti mogu biti ovlaštena osoba privatnog preduzeća:
 - a) u koje je Distrikt ulagao kapital u razdoblju od četiri godine prije preuzimanja funkcije i za vrijeme obavljanja funkcije izabranog zvaničnika, nosioca izvršne funkcije ili savjetnika;
 - b) koje sklapa ugovore ili na drugi način posluje sa Distrikтом.
- (3) Ograničenje iz stava 2, tačke b) ovog člana primjenjuje se na privatna preduzeća, koja su sklopila ugovor ili posluje sa Distrikтом, dok je izabrani zvaničnik, nosilac izvršne funkcije ili savjetnik obavljao funkciju, pod uslovom da je vrijednost ugovora ili posla sa Distrikтом veća od 5.000 KM godišnje.
- (4) Izabrani zvaničnici, nosioci izvršnih funkcija i savjetnici dužni su podnijeti ostavku na svaku od nespojivih funkcija i poslova, u roku od tri dana od dana preuzimanja javne funkcije.

Član 6a

Članovima skupštine, u smislu odredbi člana 5 stava 2 tačke a) i člana 6 stava 2 ovog zakona, smatraju se dioničari koji su vlasnici više od 1% kapitala preduzeća.

Član 7

(Zabrana djelovanja u slučaju sukoba interesa)

- (1) Izabrani zvaničnici i nosioci izvršnih funkcija ne mogu glasati po bilo kojem pitanju koje se direktno tiče privatnog preduzeća u kojem taj izabrani zvaničnik, nosilac izvršne funkcije ili interesno povezane osobe imaju finansijski interes.
- (2) Izabrani zvaničnici i nosioci izvršnih funkcija koji se nađu u situaciji iz stava 1 ovog člana, suzdržavaju se od glasanja, a na otvorenoj sjednici objašnjavaju razloge zbog kojih su suzdržani.
- (3) Nosioci izvršnih funkcija ne preduzimaju nikakve službene radnje koje bi mogle direktno uticati **na** privatno preduzeće u kojem nosilac izvršne funkcije ili interesno povezane osobe imaju finansijski interes.
- (4) Nosioci izvršnih funkcija u slučaju iz stava 3 ovog člana, suzdržavaju se od donošenja odluke.
- (5) U slučaju iz stava 4 ovog člana odluku donosi Vlada Distrikta, odnosno Skupština Distrikta, na prijedlog nosioca izvršne funkcije u kojem navodi razloge suzdržavanja od donošenja odluke.
- (6) U slučaju da izabrani zvaničnik, nosilac izvršne funkcije ne postupi u skladu s ovim članom, glas ili odluka izabranog zvaničnika ili nosioca izvršne funkcije smatra se ništavim.

Član 8

(Ugovori o ličnim uslugama)

- (1) Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim:
 - a) javnim preduzećem;
 - b) privatnim preduzećem koje sklapa ugovore ili na drugi način posluje sa Distrikтом.
- (2) Ograničenje iz stava 1 tačke b) odnosi se samo na privatna preduzeća koja su sklopila ugovor ili posluje s Distrikтом istovremeno dok izabrani zvaničnik, nosilac izvršne funkcije ili savjetnik obavlja funkciju i samo onda kada vrijednost ugovora ili posla s Distrikтом prelazi 5.000 KM godišnje.
- (3) U slučaju da izabrani zvaničnik, nosilac izvršne funkcije ili savjetnik ne postupi u skladu sa stavovima 1 i 2 ovog člana, ugovor izabranog zvaničnika, nosioca izvršne funkcije ili savjetnika smatra se ništavim.

Član 9

(Angažman bliskih srodnika)

Pod uslovima iz članova 5, 6 i 8 ovog zakona, angažman bliskih srodnika izabranog zvaničnika, nosioca izvršne funkcije i savjetnika smatra se sukobom interesa za izabranog zvaničnika, nosioca izvršne funkcije i savjetnika.

Član 10

(Zabranjene aktivnosti)

Osim ako je to izričito propisano ovim zakonom, izabranim zvaničnicima, nosiocima izvršnih funkcija i savjetnicima se zabranjuje:

- a) primanje ili zahtijevanje poklona ili druge koristi ili obećanje poklona ili druge koristi radi obavljanja javne funkcije;
- b) primanje dodatne naknade za poslove obavljanja javne funkcije, pored naknada u skladu sa zakonima;
- c) traženje, prihvatanje ili primanje poklona radi glasanja o bilo kojem pitanju ili uticanja na odluku nekog tijela ili osobe;
- d) obećavanje zaposlenja ili nekog drugog prava u zamjenu za poklon ili obećanje poklona;
- e) privilegovanje osobe radi stranačkog ili drugog opredjeljenja ili radi porijekla, ličnih ili porodičnih veza;
- f) odbijanje uvida u svoje finansijsko poslovanje;
- g) uticanje na dobijanje poslova ili narudžbi za potrebe Distrikta radi sticanja materijalne ili nematerijalne koristi za sebe ili za drugoga;
- h) korištenje povlaštene informacije o radu institucija Distrikta radi lične koristi ili koristi interesno povezanih osoba i
- i) korištenje svog položaja na drugi način, kako bi uticali na zakonodavne, izvršne ili sudske vlasti za: ostvarenje lične koristi ili koristi interesno povezanih osoba, ostvarenje povlastice ili prava, sklapanje pravnih poslova ili na drugi način interesno pogodovanje sebi ili interesno povezanoj osobi.

Član 11

(Primanje poklona)

- (1) Izabrani zvaničnici, nosioci izvršnih funkcija i savjetnici ne mogu primiti poklone u vezi sa obavljanjem javne funkcije.
- (2) Poklon u vrijednosti do 200,00 KM izabrani zvaničnici, nosioci izvršnih funkcija i savjetnici mogu zadržati i ne trebaju ga prijaviti.
- (3) Izabrani zvaničnici, nosioci izvršnih funkcija i savjetnici ne mogu primiti novac, ček ili drugi vrijednosni papir bez obzira na iznos.
- (4) Poklonom do vrijednosti iz stava 2 ovoga člana smatra se i više poklona poklonjenih od iste osobe u razdoblju od jedne kalendarske godine.
- (5) Pokloni primljeni od bliskog srodnika, kao i pokloni čija vrijednost ne prelazi 200 KM nisu obuhvaćeni ovim zakonom.
- (6) Poklone iznad vrijednosti iz stava 2 ovoga člana izabrani zvaničnici, nosioci izvršnih funkcija i savjetnici obavezni su prijaviti i predati institucijama Distrikta koje su ih izabrale ili imenovale i u čije ime obavljaju povjerenu javnu funkciju.
- (7) Institucije Distrikta su dužne informaciju o predatim poklonima dostaviti Izornoj komisiji Brčko distrikta BiH u roku od petnaest (15) dana od dana sačinjavanja informacije.
- (8) Izborna komisija Brčko distrikta BiH je dužna uspostaviti centralni registar poklona koje su izabrani zvaničnici, nosioci izvršnih funkcija ili savjetnici primili u obavljanju javne funkcije.
- (9) U slučaju sumnje u vrijednost poklona izabrani zvaničnik, nosilac izvršne funkcije i savjetnik dužan je zatražiti račun od davaoca poklona.
- (10) Vrijednost poklona je njegova tržišna vrijednost.
- (11) Primanje poklona u skladu sa stavovima od 1 do 5 ovoga člana odnosi se i na osobe koje bi primile poklon u korist izabranog zvaničnika, nosioca izvršne funkcije i savjetnika, pod uslovom da takva osoba zna za primanje poklona.

(12) Institucije Distrikta su dužne, u roku od 30 dana od dana stupanja na snagu ovog zakona, podzakonskim aktom utvrditi postupak, način evidentiranja, predaje i čuvanja primljenih poklona.

Član 12

(Obavljanje drugih poslova)

(1) Za vrijeme obavljanja javne funkcije izabrani zvaničnici, nosioci izvršnih funkcija i savjetnici ne smiju obavljati dužnost ovlaštene osobe u fondacijama i udruženjima osnovanim u skladu sa Zakonom o udruženjima i fondacijama Brčko distrikta BiH koje se finansiraju iz budžeta Distrikta u iznosu većem od 10.000 KM godišnje, odnosno u iznosu većem od 50.000 KM godišnje u fondacijama i udruženjima iz kulture i sporta.

(2) Iznimno od stava 1 ovog člana, izabrani zvaničnici, nosioci izvršnih funkcija i savjetnici mogu obavljati izvršnu funkciju u fondacijama i udruženjima, koji se ne finansiraju iz budžeta Distrikta, osnovanim u skladu sa Zakonom o udruženjima i fondacijama Brčko distrikta BiH.

Član 13

(Lično finansijsko stanje)

Izabrani zvaničnici, nosioci izvršnih funkcija i savjetnici dužni su dostaviti redovne finansijske izvještaje u skladu sa zakonom i propisima Izborne komisije Brčko distrikta BiH.

TREĆI DIO - IMPLEMENTACIJA I POSTUPAK PRED IZBORNOM KOMISIJOM BRČKO DISTRIKTA BiH

Član 14

(Nadležnost Izborne komisije Brčko distrikta BiH)

(1) Izborna komisija Brčko distrikta BiH (u daljnjem tekstu: "Komisija") osnovana u skladu s Izbornim zakonom BiH i Izbornim zakonom Brčko distrikta BiH odlučuje da li neko djelovanje ili propuštanje predstavlja kršenja odredaba ovog zakona i odlučuje o svim drugim pitanjima u vezi sa sprovođenjem ovog zakona.

(2) Komisija djeluje na osnovu ovog zakona, dobrih običaja, političke odgovornosti i vjerodostojnosti izabranih zvaničnika, nosilaca izvršne funkcije i savjetnika.

(3) Komisija donosi odluke konsenzusom svih članova kada odlučuje o pokretanju postupka na osnovu prijave ili po službenoj dužnosti, o tome da li određeno ponašanje izabranog zvaničnika, nosioca izvršne funkcije i savjetnika predstavlja povredu odredbi ovog zakona, te o vrsti sankcije.

(4) Ostale odluke iz svoje nadležnosti Komisija donosi većinom glasova svih članova, koja podrazumijeva glasove najmanje po jednog člana iz svakog konstitutivnog naroda.

(5) Postupak provođenja ovog zakona, bliže se uređuje Poslovníkom o radu Komisije.

(6) Radi primjene ovog zakona Komisija daje mišljenja, donosi uputstva, propisuje obrasce i način vođenja registra. Komisija donosi pravilnik o načinima vođenja registra, kojim se propisuju pravila o vođenju postupka i o obrascima, kao i druga pitanja neophodna za funkcionisanje registra, donosi pravilnik o postupku kojim se propisuju provedba pravila o vođenju postupka i dostavljanju odluke te sastavljanju izvještaja.

(7) Komisija donosi odluku o tome da li je određeno djelovanje ili propust povreda odredbi ovog zakona. Odluke Komisije moraju biti obrazložene.

(8) Komisija podnosi jednom godišnje izvještaj o provođenju ovog zakona Skupštini Brčko distrikta BiH.

Član 15

(Postupak pred Komisijom)

(1) Komisija može pokrenuti postupak iz svoje nadležnosti na osnovu svoje odluke povodom vjerodostojne, osnovane i neanonimne prijave ili po službenoj dužnosti u slučajevima kada raspolaže saznanjima o mogućem sukobu interesa izabranog zvaničnika, nosioca izvršne funkcije ili savjetnika. O pokretanju ili nepokretanju postupka Komisija donosi odluku u pismenoj formi. Komisija je dužna izvijestiti podnosioca prijave o svojoj odluci.

- (2) Komisija obavezno pokreće postupak iz svoje nadležnosti na lični zahtjev izabranog zvaničnika, nosioca izvršne funkcije ili savjetnika.
- (3) Komisija će o pokretanju postupka iz stava 1 ovog člana izvijestiti izabranog zvaničnika, nosioca izvršne funkcije ili savjetnika te obavezno zatražiti njegovo izjašnjavaње o navodima prijave koje je izabrani zvaničnik, nosilac izvršne funkcije ili savjetnik dužan dostaviti Komisiji u roku od 15 dana od dana prijema pismenog zahtjeva.
- (4) Podnosiocu prijave iz stava 1 ovog člana garantira se zaštita anonimnosti.
- (5) Komisija ima pravo utvrditi činjenice vlastitom istragom ili pribaviti činjenice i dokaze posredstvom drugih organa vlasti. Svi organi vlasti, institucije i sudovi Brčko distrikta BiH obavezni su Komisiji pružiti zatraženu pravnu pomoć i sve druge vidove pomoći.
- (6) Komisija će u slučaju sumnje o postojanju kršenja odredbi ovog zakona obavijestiti lice za koje postoji osnovana sumnja da je prekršilo ovaj zakon, tražeći od njega izjavu o navodima sadržanim u prijavi.
- (7) Izabranom zvaničniku, nosiocu izvršne funkcije ili savjetniku i drugim učesnicima u postupku utvrđivanja činjenica i dokaza mora se omogućiti zaštita integriteta ličnosti, o čemu brine Komisija.
- (8) Ako postoji sumnja u vezi s mogućim kršenjem ovog zakona, Komisija će dati svoje mišljenje na zahtjev svakog lica ili institucije koje to od nje zatraži.
- (9) Izuzev slučajeva kada je to Zakonom drugačije propisano, postupak pred Komisijom, osim postupka glasanja, otvoren je za javnost. Nakon provedenog postupka Komisija je dužna konačnu odluku donijeti najkasnije u roku od 15 dana od dana okončanja postupka prikupljanja činjenica i izvođenje dokaza i javno je objaviti.
- (10) Odluke Komisije moraju biti obrazložene i objavljuju se na njenoj internetskoj stranici.

Član 16

(Upravni spor)

- (1) Protiv odluke kojom se izabranom zvaničniku, nosiocu izvršne funkcije ili savjetniku izriče sankcija iz člana 17 ovog zakona nije dopuštena žalba, ali se može pokrenuti i voditi upravni spor u skladu sa Zakonom o upravnim sporovima Brčko distrikta BiH.
- (2) U slučaju pokretanja upravnog postupka, izvršenje odluke komisije odlaže se dok se ne iscrpe pravni lijekovi.

Član 17

(Sankcije)

- (1) Sankcije koje Komisija može izreći izabranom zvaničniku, nosiocu izvršne funkcije ili savjetniku su: obustava isplate dijela neto mjesečne plate, prijedlog za razrješenje s dužnosti i poziv za podnošenje ostavke.
- (2) Ako se utvrdi da izabrani zvaničnik, nosilac izvršne funkcije ili savjetnik povređuje odredbe članova 5, 7, 8, 10, 11 i 12 ovog zakona, Komisija izriče sankciju obustave isplate do 50% neto mjesečne plate vodeći brigu o težini i posljedicama povrede zakona.
- (3) Ako se utvrdi da izabrani zvaničnik, nosilac izvršne funkcije ili savjetnik povređuje odredbe članova 6 i 9 ovog zakona, Komisija izriče sankciju obustave isplate do 30% neto mjesečne plate vodeći brigu o težini i posljedicama povrede zakona.
- (4) Sankcija obustave isplate dijela neto mjesečne plate izabranog zvaničnika, nosioca izvršne funkcije ili savjetnika ne može trajati duže od 12 mjeseci, a iznos obuhvaćen obustavom ne smije prelaziti jednu polovinu neto mjesečne plate izabranog zvaničnika, nosioca izvršne funkcije ili savjetnika.
- (5) Izuzetno od odredbi stava 4 ovog člana, obustava isplate dijela neto mjesečne plate izabranog zvaničnika, nosioca izvršne funkcije ili savjetnika može trajati duže od 12 mjeseci sve do razrješenja s dužnosti, odnosno podnošenja ostavke ili otklanjanja razloga koji su ga doveli do sukoba interesa u skladu s članom 17a stavom 4 ovog zakona.
- (6) Odluka o sankciji dostavlja se lično izabranom zvaničniku, nosiocu izvršne funkcije ili savjetniku. Izvršnu odluku Komisija radi provedbe dostavlja službi koja vrši obračun plate izabranom zvaničniku, nosiocu izvršne funkcije ili savjetniku.

(7) Izabrani zvaničnik, nosilac izvršne funkcije ili savjetnik obavezan je vratiti poklon ili novac koji je ekvivalentan vrijednosti poklona i dobit ostvarenu od naknada za vršenje javne funkcije zbog koje je bio u sukobu interesa, o čemu Komisija donosi zaključak.

(8) Ako je primjereno vrsti povrede, Komisija može tokom postupka naložiti izabranom zvaničniku, nosiocu izvršne funkcije ili savjetniku da otkloni uzroke postojanja sukoba interesa u određenom roku te, ako izabrani zvaničnik, nosilac izvršne funkcije ili savjetnik to učini, može obustaviti postupak ili isti dovršiti i ispunjenje naloga uzeti u obzir prilikom izricanja sankcije.

(9) Nakon što izrekne sankciju, Komisija daje rok od 30 dana da imenovani zvaničnik, nosilac izvršne funkcije ili savjetnik otkloni razloge koji su ga doveli do sukoba interesa".

Član 17a

(Prijedlog za razrješenje i poziv izabranom zvaničniku, nosiocu izvršne funkcije ili savjetniku za podnošenje ostavke)

(1) U slučaju da i nakon isteka roka iz člana 17 stava 9 ovog zakona izabrani zvaničnik, nosilac izvršne funkcije ili savjetnik ne otkloni razloge koji su ga doveli do sukoba interesa, Komisija bez odgađanja dostavlja obrazloženi prijedlog za razrješenje izabranog zvaničnika, nosioca izvršne funkcije ili savjetnika nadležnom organu vlasti koji je izvršio imenovanje ili poziva izabranog zvaničnika, nosioca izvršne funkcije ili savjetnika na podnošenje ostavke.

(2) Ako je izabrani zvaničnik, nosilac izvršne funkcije ili savjetnik razriješen javne dužnosti u skladu sa stavom 1 ovog člana, organ vlasti koji je razriješio zvaničnika o tome će obavijestiti Komisiju.

(3) U slučaju neprihvatanja prijedloga Komisije za razrješenje izabranog zvaničnika, nosioca izvršne funkcije ili savjetnika organ vlasti, nadležan za imenovanje, dužan je iznijeti razloge odbijanja prijedloga.

(4) Ukoliko izabrani zvaničnik, nosilac izvršne funkcije ili savjetnik ne bude razriješen dužnosti, odnosno ne podnese ostavku protivno odredbama članova 17 i 17a ovog zakona ili ne otkloni razloge koji su ga doveli do sukoba interesa, Komisija će izricati nove sankcije obustave isplate dijela neto mjesečne plate sukladno ovom zakonu do otklanjanja razloga, odnosno napuštanja funkcije.

(5) U slučaju kada Komisija pozove na podnošenje ostavke izabranog zvaničnika, nosioca izvršne funkcije ili savjetnika na vršenje javne dužnosti, poziv se objavljuje u Službenom glasniku BiH, Službenom glasniku Brčko distrikata BiH, dnevnim novinama koje se distribuiraju na teritoriju cijele Bosne i Hercegovine i na internet-stranici Komisije.

(6) Novčane kazne iz članova 17 i 17a ovog zakona uplaćuju se u Budžet Brčko distrikta BiH.

Član 18

(Zastarijevanje pokretanja postupka)

Zastarijevanje pokretanja postupka za primjenu sankcija propisanih ovim zakonom nastupa u roku od četiri godine od dana navodnog kršenja ovog zakona.

Član 18a

(Prelazne odredbe)

(1) Svi postupci pokrenuti do dana stupanja na snagu ovog zakona bit će okončani prema odredbama koje su važile do dana stupanja na snagu ovog zakona, ako je to povoljnije za stranku u ovom postupku.

(2) Komisija će u roku od 120 dana od dana stupanja na snagu ovog zakona donijeti sve akte za provođenje ovog zakona.

(3) Komisija će u roku od 60 dana od dana stupanja na snagu ovog zakona preuzeti od Centralne izborne komisije BiH sve predmete iz oblasti sukoba interesa i sve neophodne evidencije potrebne za rad Komisije.

ČETVRTI DIO - ZAVRŠNE ODREDBE

Član 19

(Stavljanje van snage)

Stupanjem na snagu ovog zakona stavlja se van snage Zakon o sukobu interesa u institucijama Brčko distrikta Bosne i Hercegovine (Službeni glasnik Brčko distrikta BiH, brojevi: 2/03 i 19/07).

***Samostalni član Zakona o izmjenama i dopunama
Zakona o sukobu interesa u institucijama Brčko distrikta Bosne i Hercegovine***

("Sl. glasnik Brčko distrikta BiH", br. 3/2015)

Član 7

(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.